

FABRICA DI MANTECA

Prome cu Compania di azeta a bini na Aruba, un gran parti de e habitantenan di Aruba tabata gana nan bida cu agricultura. E mina di oro na Balashi no por a duna trabao na tur hende. Hopi hende na Aruba tabata cria baca. Pero e idea di cooperativa, di cooperacion no a drenta ainda den e pueblo.

Na Curaçao Pastoor van de Pavert y Pastoor Verriet a lanta caba un cooperativa rond di anja 1910. „Coöperatieve Vereniging en Nijverheid”. Ey tur cos a bai basta bon. Hopi hende a hanja un bon judanza den e Cooperativa.

Anja 1916 pader van de Pavert a bira Pastoor di Noord na Aruba. E tabata yen di bon idea. Y ora el a mira cu na Aruba crianza di baca tin su balor, unbez el a saca idea di cuminza na Aruba un Cooperativa pa traha y bende manteca. E mes anja 1916 Aruba tabatin su Cooperativa bao di nomber oficial „Agencia di Fabrica di mantequilla Santa Anna Aruba Company”. E tres persona mas principal di e Compania ey cu a forma e directiva, tabata Antonio Ruiz, presidente, Carmelo Semeleer, agente, y Manuel Flaningin, cahero.

Hopi otro kunukero mas a join cu nan, p.e. Abelino Eduardo, Julian Tromp, Francisco Ruiz, Antonio Kelly, Carmelo Tromp, Jan Hendrik Christiaans. Tur e miembronan a forma un fondo di placa, un sorto di accionnan, pa cuminza e Compania. Nan tur por a entrega lechi na e Compania tur dia.


Na cas di Antonia Ruiz na Washington, den un magasina, nan a cuminza traha manteca. Esey tabata e Fabrica di mantequilla. Soeur Bertranda, cu su majornan tabata kunukero, tambe duna su apoyo. El a sinja nan traha manteca y keshi y hala lechi segun un systema mas correcta, p.e. mara pianan di baca.

Na principio nan a bati e lechi den un calabas grandi, cu ta jama banganja. Mas despues Benjamin Ruiz y Eduardo Tromp, dos carpinter, cu a traha hopi pa Misanan di Aruba, a traha baril di palo pa bati lechi aden. Jan Hendrik Christiaans, cu tabata un bon metslâ, a bira tambe un bon batidor di lechi. Tur dia 5 mardugá Jan Hendrik tabata na e Fabrica di manteca pa haci su trabao. Algun mucha muhernan tambe a sinja e trabao ey cerca Soeur Bertranda. p.e. Emilia Semeleer y Presentacion Kelly, Maria Ruiz. E trahamento di keshi a tuma lugar den haandrij di combento di Soeur na Noord.

Pa favorece e produccion di lechi, Pastoor van de Pavert a spierta hende pa planta palagras pa cuminda di baca. E mes a plante tambe den su kunuku, caminda actualmente Imeldahof ta. Tur dia e mester a muha e palagras cu awa di poz. Pero e resultado no tabata muchu bon. Awa di poz tabata brak.

Carmelo Semeleer tabata agente biahero di Compania pa bende manteca y keshi na Curaçao. E kalmekki, cu a sobra despues di a saca manteca di e lechi, a hanja un bon bendida na Playa.

Alafin despues di algun luna Carmelo Semeleer por a binba e promer cargo di manteca y keshi pa Curaçao. El a hanja e barco „Beatrice” cu a tuma e



cargo ey. Secundino Wolff di Playa tabata captan di barco. Josef Schwengle di Savaneta, Augustin de Cuba di Alto Vista y Dominico Giel tambe a bai bordo como pasahero pa busca trabao na Curaçao.

Durante e anochi e barco a perde rumboy mas of menos 5 or di mardugá e barco a dal cu klop di costa di Venezuela banda di Ricla y Matagordo. E barco a kibra, un parti di cargo di manteca y keshi a bai perdi y e otro parti nan por a pone na tera.

Despues Carmelo a bende e manteca y keshi na Ricla, pero barata pa sali di dje. E pasaheronan a pasa hopi molester pa sigui nan biahe pa Curaçao.

E kibramento di barco tabata tambe kibramento di fabrica. E gastonan a sali muchu haltu y ganashi tabata muchu poco, ora cu nan por a bende nan productonan na Playa.

E Fabrica di Mantequilla a sali un fracaso. Despues nan a canta na Aruba: „Fabrica a kibra riba Ricla. Bam pidi Dios pa Senjor Semeleer”.

Ma tambe e bendedora di kalmekki a sali den cantica:

„Djowiki a bai pa Playa:
Cu su yewa di ocho placa.
Cristina, bo'n por papia,
Cu totekki a cai den kalmekki”.